

# 巾幗鬚眉傳卷一

## 費宮人傳

費宮人年十六。未詳其何地人。德容莊麗。懷宗語周后命侍公主。主絕憐之。宮人見上憂流氣日熾。未嘗不竊抱杞人慮也。王承恩者。懷宗之近侍也。宮人私向之問寇警。承恩曰。若居深禁。何用知此。宮人曰。惟居深禁。不可不知。而預爲計也。承恩奇之。寇愈熾。懷宗憂愈深。宮人之問承恩者愈數。承恩曰。若何不詢諸他人。而惟予數數也。宮人曰。人皆泄泄。孰是以君國爲意者。吾見公忠誠。故相問耳。承恩益奇之。曰。若云預爲計。計安出。宮人曰。設不幸。計惟有死。要不可徒死耳。承恩曰。古人云。使生者死。死者復生。生者不食其言。可爲信矣。若能之乎。宮人曰。請驗之。異日有魏宮人者。年差長於費。亦端麗。素與費善。聞其言曰。卿計甚難。吾不能爲難者。當其時。惟一死以伸吾志耳。承恩並奇之。甲申三月十九日。李自成破都城。王承恩走報帝。帝與后泣別。宮中之人皆環泣。后自縊。袁貴妃亦自縊。帝拔劍刃所御嬪妃數人。召公主至。曰。爾年十五矣。何不幸生我家。左袖掩面。右手揮刃。斷左臂。未死。手慄而止。隨與承恩至南宮。登萬歲山之壽皇亭。自縊。帝居中。而承恩右。承恩且從容拜命。而相隨於鼎湖也。

時尙衣監何新者趨入宮。見帝不得。見公主仆地。他宮人悉散走。費宮人哭侍其側。相與救之而甦。公主曰。父皇賜我死。我何敢偷生。且賊至必索宮眷。我終難匿也。宮人曰。請以主服賜婢。婢當誑賊以脫主。顧安所往乎。何新曰。國丈第可也。主授衣與婢。而泣與之別。新倉皇負主出。李自成射承天門。將入宮。魏宮人大呼曰。賊人入內。我輩必受辱。有志者早爲計。奮身躍入御河。須臾從之死者盈三百。翠積脂凝。河水爲之不流。而香且數日也。費宮人目送其死而還。服主服。匿智井中。賊鉤而出。見李自成曰。我長公主也。若不得無禮。自成見其豐豔。心欲納之。而每匿御座。輒神搖目眩。見白衣人長數丈者在前立。又恍如帝之辟易於其左右也。心畏之而不敢。以賜其愛將羅姓者。羅於闖衝陷攻取。居首功。故自成賜之。以酌勳。羅甚喜。宮人曰。闖命吾不敢違矣。然我帝子也。爾能設祭祭先帝。而耐從難。太監王承恩於其側。從容盡禮。則從子矣。羅更喜甚。從其請。宮人泣拜先帝畢。併拜承恩曰。王公王公。爾能死而復生。以驗吾言乎。吾將踐平生言矣。諸賊大張樂。爲羅賀。羅痛飲大醉。入內。宮人亦具酒。爲同牢。酌又以大觥連飲。羅曰。吾得子。欲草一疏謝闖王。而愧無人。宮人曰。是何難。我能之。君盍寢。俟我撰就語君也。羅愈喜。陶然就臥。駢如雷。宮人屏去侍女。挑燈獨坐。聞中外之籟俱靜。於是以纖指挾匕首。腕羅賊之喉。力刺之。羅頸裂。負痛躍起。屢仆屢躍。而始僵。賊衆驚闖。排闥救之。已無及。時華燭尙明。衆見宮人盛粧端坐而無

語審視之。則以剉粉項而悠然逝矣。聞於自成。自成駭嘆而禮葬之。遂以爲公主。已而不復索。

### 果勇夫人

嘉道間名將。首推二楊。功業威名彪炳一世。而果勇侯夫人龍氏。臨機應變。卓識鴻才。則有世所不盡知者。夫人爲蜀之華陽縣人。廣東佛山同知廷泰女也。果勇任甯陝總兵。夫人歸焉。初婚三日。終南教匪漸熾。侯卽率兵援賊。明年調署固原提督。夫人方懷妊。未行。及秋。甯陝總兵以停餉兩月。嘖有叛言。鎮將不善駕馭。勢岌岌不可終日。或請夫人乘夜速行。夫人曰。叛否不可知。若行而後叛。是通賊也。不然。何以先知。卒不行。亂作。殺營官。肆焚掠。圍城擾攘。官民眷屬。夤夜驚竄。反依夫人爲逃死藪。方是時。未叛者拒於內。曰。夫人勿死。我輩受恩重。誓禦賊以衛夫人。卽不敵而死。主將聞之。亦見我輩心也。已叛者拒於外。曰。夫人勿驚。我輩受恩重。情急而叛。無與夫人事。誠慮外寇驚及夫人。主將聞之。無以明我輩心也。先是鎮署司餉朱之貴者。性苛刻。衆欲殺之。夫人藏之複壁中。伴令追捕。衆意乃釋。黎明。叛衆請見夫人。奴輩及避難婦女。倉皇號涕。求勿放入。夫人怒曰。生死有數。敢涕泣而懲之。且朽牆薄壁。脫有他意。誰能禦之。請見則見。何畏之有。命左右啓門而出。端坐堂上。叛首數十人。血臂淋漓。伏地痛哭。請送夫人出城。夫人曰。誰則戕官。殺人者抵命。於汝衆人何尤。速擒首逆。絕妄念。主將或可申奏朝廷。

予以生路。衆曰：我輩結盟誓同生死，不能違夫人命。謹備輿馬以俟。諸婦女又曰：夫人行，我輩死矣。夫人曰：此輩皆我故舊，須隨我出，不得傷殘。卽出婢媪衣履，與官眷結束。次第啓行而已。乃乘輿殿後，甫出署，叛衆發號傳隊以送。夫人呵曰：止！此何時何等狂悖，而猶循此虛文耶！除現在署前者，餘皆不得露面。衆唯唯，送至澗溝，哭拜而返。適遇之貴於途，舉刃擬之曰：汝今日亦入我輩手耶？之貴曰：我藏複壁，夫人計也。夫人忘盟益命我送往。汝等欲殺我，卽轉賣盃盆去。衆審視良久，曰：且爲此盆饒汝。明日行抵石泉縣，石泉百姓方遷徙，縣令不能止。聞夫人至，公服攀轅，留守城河。越六日，始就興安免身。時典郡興安者，夫人從兄變堂也。初果勇於固原，聞變，遣屬將選兵進勦，而自帥親丁四人，冒雨急馳千二百里，三晝夜而至。齧屋得變堂書，知夫人已住興安，卽馳往石泉，撫賊解鄂縣圍，賊首蒲大芳，公舊部也。素得衆心，公又素得大芳心，乃單騎入賊壘，諭以順逆利害，設令投誠，仍同入甯陝鎮城，約束歸伍。而大芳心懷反側，意頗悔降，遂以願赴興安，迎致夫人爲請，實以試主將心也。果勇立允所請，不增一奴，或謂夫人明哲，必托辭不行。比大芳至，天大風雪，夫人冒雪抱子，泰然登程。越日道經漢陰廳，大芳與同行王奉者相闕，夫人入廳署，訊知曲直，棍責大芳四十，械繫而行。將至鎮城，降衆代求免繫，更乞勿使主將知。夫人許之，及見果勇，詢問公私，悲喜交集，獨不言途責大芳事。居十日，各帥遣都守馳候果勇，見左右役使皆